

08/07/1998

Media perlu jujur sampaikan maklumat

SHAH ALAM, Selasa - Datuk Seri Dr Mahathir Mohamad berkata media massa perlu memainkan peranan aktif dan jujur dalam menyampaikan maklumat yang boleh mendorong dan menggerakkan rakyat ke arah mencapai kecemerlangan dan kejayaan.

Penguasaan terhadap maklumat memberi kelebihan kepada pemiliknya untuk merancang strategi menghadapi cabaran dan menentukan kejayaannya, kata Perdana Menteri dalam perutusan buku cenderamata sempena pelancaran Pusat Penyiaran NTV7 di sini, malam ini.

Hadir sama di majlis pelancaran itu ialah beberapa menteri Kabinet, Ketua Menteri Sarawak, Tan Sri Abdul Taib Mahmud dan Pengerusi NTV7, Datuk Effendi Norwawi.

Mengenai NTV7, Dr Mahathir berharap stesen televisyen itu berusaha memupuk semangat perpaduan dan integrasi di antara rakyat Sabah dan Sarawak dengan masyarakat di Semenanjung.

Dalam temubual dengan NTV7 yang disiarkan secara langsung menerusi siaran beritanya, Perdana Menteri meminta rakyat terus membeli barangan Malaysia.

"Dengan membeli barangan Malaysia, rakyat negara ini akan dapat membantu memulihkan ekonomi negara," katanya.

Majlis pelancaran itu diikuti persembahan secara langsung 'Konsert Antara Dua Irama' yang menampilkan gabungan beberapa artis lama dan baru seperti Aziz Sattar, S Shamsudin, Erra Fazira, Ziana Zain, Siti Nurhaliza, Camelia, Ida Nerina, Jit Murad dan Jay Jay.

Konsert Antara Dua Irama adalah penghargaan NTV7 kepada Allahyarham Tan Sri P Ramlee yang sehingga kini terus menjadi pendorong kegiatan seni di kalangan artis tempatan.

Konsert Antara Dua Irama siaran NTV7 itu diteruskan dengan filem klasik lakonan P Ramlee yang masih diminati ramai, Madu Tiga.

(END)